

豫章叢書

第二冊



日涉園集卷一

宋 李彭 撰

五言古詩

次正平上座韻贈子充

吾宗大宛種未入十二閑
膺門沫流赭氣已無燕山
何時黃金羈鞍轡長楸間
皎皎自空谷待君當御還
戲贈兼簡李翹叟

荊州有醉客踏雪至我廬
缺月寒皎皎掛在東南隅
索我五字句慙非競病徒
賣菜欲求益故態發狂奴
寄聲李夫人聊爲一笑娛

贈子充

阿充克家才昭代真孝秀白髮在板輿色養侍昏晝
來營甘脆具底事成宿留到骨似我窮黃鍾滿君脰
落帆哉生魄步屨月成穀幽園語更僕莫遣雙眉皺
覓句洗愁兵河傾轉箕斗

贈無著

蕭蕭玉澗翁韻調實瓊朗懷人修文去音塵生逸想
豈唯招重客我廬亦時枉微軫發妙言幽園復清曠
縹思下巖隈歲月駛雨梁寒蟬久停號新禽哢佳響
去者念履綦方來警蕙帳伊子厭囂塵絕壑期自放

從君割牛峯披雲同矯掌

送人遊吳

朔風號木末迫此歲時晏驅車不停軌客子老昏宦
平生蔣詡徑求羊每娛玩持觴送落日抵掌河宿爛
胡爲向吳會雅意訪親串親串者誰歟昂昂金閨彥
噓枯由涵照要津藉推挽念子赴修塗發軔在昧旦
娟娟所嬌兒疑疑越門限閨人密縫裳遐征苦多綻
結束志千里二事忘一盼莫遣屢屢歌愆期發長嘆

宿歸元贈軾老

平生丘壑心祇園多幽趣杖藜過懸崖投足澄百慮

涓涓一滴泉湛湛三危露淵源自曹溪甘腴勝牛乳
諸峯羅孫曾一一尊鼻祖法筵碧眼人家世本鄠杜
紫樞與黃閣去天纔尺五不爲世網嬰粲可叶心素
繩牀作禪定太音響韶護應夢先補陀祝髮得玉斧
我來心眼明意氣諧律呂金地雨曼殊天香遶巾履
明當整歸鞍天末蜚鴻度

奉贈正平上座

若人韻凝遠天資復敦龐蕭然出塵表幽寺聽逢逢
劍峯極天靜懸瀑聲春撞心猿久調御業白瑩明缸
殘河橫曉鉢霽霧起寒窗禪餘覓佳句鼎鼐筆能扛

我來孟冬月望履塵心降世紛劇羊負是身如帝江
願借三峽水一滋隴頭瀧永辦桑門服猶堪追老龐

和連雨獨飲

力田勝巧宦燕息自超然懶觀竹素書俯仰丘壑間
時時過祇園亦復舞胎仙偶然得歡趣舉觴望青天
六鑿自無競歛見象帝先羲皇隔晨炊坐見溘風還
磨螳不少留鼎鼎遂百年但得會心侶相對兩忘言
次秦處度贈歸宗老示中上座韻

夕霏催節往槁葉徑辭風力疾招秦叔望山扶老筇
泄雲爲卿靄牽余來鷺峯中有龐眉老常持半聖弓

一席跨牛地誅茅期此同虛懷包朗月意表得詩翁
遠志是小草慎在出處中公莫厭苦相歲晏長相從

嗣首座以老夫詩西嶺障斜日爲韻作五章見

寄次韻答之

尋春舍南北呼酒玉東西絕勝劉校尉太乙持青藜
天邊藝蘭人風光今幾畦胡爲寂滅海妙語紆虹霓
清霜熟柿栗會面一俄頃蕨拳漸紫苞鳥語度諸嶺
仰頭占昏中弧星光炳炳何當聽談玄令我發深省
我家二季子風標荀令上優孟何足求慎勿作楚相
毛顏獨摧顏兒能縛籬障摩挲繭栗姿我老那復壯

爭端起儒墨春蚓兼秋蛇筆研真淺事專門自名家
但有香積飯不妨薰毗耶溫風媚高柳招客整還斜
歐峯壓半天堦除轉晴日落磴多雪芽香草皆碧蕊
嗣公釋門老耽耽虎而翼我欲往叩之藤蘿迷石室
再和嗣首座五詩寄舒老微老

在昔董仲舒屈身相膠西窮經著繁露窺園廢杖藜
而我異於是清晨來灌畦雨餘聊自適微吟看斷蛻
黃生牛醫兒襍量包萬頃稱譏等夢事緩帶耳不領
公議如丹青千載煥且炳古人何必遠薄躬吾屢省
堂堂一舒翁道價融壑上煙霞斷塵緣那復知苦相

會將超諸緣奪我事理障莫言霜滿頤矍鑠一何壯
嗣公丹鳳羽高笑破羣蛙汲引後來秀義俠如朱家
出語掩顏謝遊戲達摩耶卧讀春風句飛鴻澹墨斜
牧菴擔板翁銳氣如平日明壁不可瑕崇蘭有餘蕊
何嘗疲津梁苦鍛垂天翼索價無乃高孤峯問少室

送泉上人復往荆南

荊州老居士曾著進賢冠似欲專一壑其誰知孔鸞
蒼苔門巷秋不許造席客世無王粲流倒屣端不惜
上人宣城彥俊氣橫九州學道貧徹骨與世初無求
馬駒大道場屬者失宗匠欲銘翠堵坡見此真漢相

行乞千里餘朔風枯葉顛曉踏澗下雪暝宿天邊烟
赤手泛滄溟笑此太草草不爲丞相嗔乃得照乘寶
歸來寂無聞翠埃開險艱精衛旣填海愚公果移山
力貧辦行李復作南郡去游子多苦顏開士淡無慮
霜風木颼颼便當賦式微日涉望烟靄扶筇遲來歸

奉贈歸宗才首座

五著匡山履三息紫霄陰恭聞耶舍塔勢吞天姥岑
俯窺鵬鶚背上聆鐘梵音未航蕭梁葦峻風先少林
靈骨化大璐鉅名偕南金松門欲牽葉苦雨每見臨
才公三衢秀古貌又古心老胡卽渠是宴坐藏幽深

何用登紫霄自足披煩襟我過避秦客茗椀來相尋
真成虎溪笑稍寬梁甫吟衲子嘆雌伏道師非陸沉
世多石窟病須下鼓山針

送寧上人歸淨慈

之子遠行邁眷言歛松門雲物起離色況乃聞清猿
頗云吳會去飽參南山禪南山燕領郎氣敵千人軍
要當理斷履過我藝蘭蓀

寄珍首座

詩寧淺而靜不貴深而蕪觀公秋懷作皎潔仍紆餘
譬之列華饌陸海盈中厨食蟹貴抱黃食魚先腹腴

多入出或少我昔聞先儒年來病蹇拙意廣才復疎
之子禪定起焚香滿晴虛坐看氤氲處縣縣詩思俱
應作牛腰束能寄草堂無

題胡九齡畫夏景牛

陰岑不造天憇此老斲觔輟耕壘上來投閑慰心曲
養牲奉嚴禋蓋用爾栗犢莫起陸沉悲焉知果非福
送敦詩遊臨川

呂郎客秦淮詩思翻秋濤徐郎憇瀟峯句壓天柱高
相此兩公子信是千人豪叔也往從之似欲訴不遭
探囊得長句如取綏山桃療飢非蒸砂禦寒必綈袍

一簪未著身所得不補勞復爲飢所驅未許學卧陶
窮軍敵孤客如在皋蘭塵幾成劉文叔鬚髮變二毛
指筇峭草鞋進退似桔槔引領長江西沙頭喚魚舸
金溪有謝侯胷多畧與韜天資類文靖貌實中郎曹
叔也往從之攻愁解韃囊毋輕歌驪駒不復吟畔牢
待公柶載歸爲我攜蒲萄來賞傲霜菊一尊澆老饕

和李敞戲書

短草被南陌絲颺幽軒心靜境云寂默居宣妙言
林深鳥鳥樂花繁蜂蝶喧是中卽真意何須祇樹園
元夕高卧

伊昔宅闕輔門閭萃冠蓋停杯邀明月意氣殊謄謄
春風墮江城蒐獮顏鬢改糞除二畝地羊裘力薪採
矯首望舒圓何由賞心在煙村雜簫鼓叢祠響竿籥
誰能伴兒嬉頗復償睡債初驚金鳴雷遽作濤擣海
非關骨相屯長閑荷真宰吾生計已決無勞問蒼蔡

宿西林寺有先特進及先學士詩

渡江送行人我行亦清興草木春路賒斜斜復整整
獨造此寶坊深穩庭宇靜複閣褫煙霞疎林泄鐘磬
殘僧澀對人短童工汲井杖屨亦能神迥知茲遊勝
檀間盤硬語怪底光炯炯追邇曾高風熟復發深省

來歸十陽秋足不踐斯境猿鶴情未忘拾松來煮茗
何生用韻見寄復答之兼示小何

繞屋陰扶疎空堦薛文皺懷人殊未來安得傾蓋舊
好鳥政相呼吟蛩俄應候夜夢嵇阮輩醉鄉須少留
莫踏肥馬塵我自貧馬瘦

水部有耳孫湖海胷中浩小陸復何人相逢歲亦早
並游蘇黃門我曹不容掃梧桐生朝陽要須聞鳴鳥
雲中遣馮唐據鞍未渠老

次韻答禹功兼簡周國振時禹功一夕泛舟歸
郡不及語離

攀蘿委松宿漱石看雲行松疎腴色漫雲度夕陰生
若人有高躅領畧遺世情聊爲公府步冉冉復盈盈
蒼苔映槿墉商飈薄庭樹方期著屐來遽作張帆去
擇交如擇金披沙歟相遇慈明謂無雙偉節慙最怒
公抱青田姿俯啄家雞羣微之挂頰外遐矚西山雲
昔我藻鑒士泗外老仙宜州杜史拱木蔽孤墳詎意王子敬晚
乃知羊欣

相望兩牛鳴頓覺千里別未別如懷冰別來三伏熱
賴有清暉吟當窗時玩閱音塵在我前悠然情話說
飄飄顧曲郎恬愉仍靜深相逢何必早但貴相知心

臨博識斯道聞韶真賞音端須理三徑歲華多浸淫
王生以詩見貽次韻答之並視脊中環中寶仲

父

渠渠太史門諸郎蓋當世大匠無棄材知人亦未易
阿戎兩雲孫駸駸遣人畏難兄江南秀美比嘗託意
歎爲修文郎不作活國士令弟老數奇禪寂甘窮願
時於翰墨場往往見高致揚州故時語奕奕好風氣
獨識史君顏周禮秉早歲背城幾借一問學晚尤粹
相逢且班荆十事欲九異何須張女彈端爲建康醉
請拋高門竿莫反魯麟袂花藥聘君湖隄風攬春思